

Gagal seludup 5,000 diesel



PETAK menyimpan ikan yang diubahsuai dijadikan tangki diesel di atas sebuah bot. FOTO Ihsan KPDNHEP Kelantan.

Oleh Siti Rohana Idris
am@hmetro.com.my

KIRA-KIRA 5,000 liter diesel yang dipercayai untuk diseludup ke Thailand ditemui disorok di petak menyimpan ikan yang diubahsuai dalam sebuah bot nelayan.

Bagaimanapun taktik itu berjaya dihidu pihak berkuasa yang menjalankan risikan sebelum bot kelas A itu diperiksa di perairan Sungai Golok, Tumpat, pada 10.15 pagi hari ini.

Ketua Penguat kuasa Kementerian Perdagangan Dalam Negeri dan Hal Ehwal Pengguna (KPDNHEP) Kelantan, Azanizam Affendi Juri berkata, terdapat seorang tekong warga tempatan berusia berusia 32 dan awak-awak berusia 50-an berasal dari Narathiwat, Thailand di dalam bot terbabit.

"Pemeriksaan lanjut menemui 5,000 liter diesel bernilai RM10,900 yang disyaki untuk diseludup ke negara jiran.

"Ia disimpan di tangki di dalam bot termasuk tangki di dalam petak menyimpan ikan di hadapan bot yang diubahsuai," katanya ketika dihubungi, hari ini.

Bot itu ditahan dengan kerjasama Pasukan Polis Marin (PPM) Wilayah Tiga Pengkalan Kubor sempena Op Pensura Khas Musim Perayaan Tahun Baru Cina.

Azanizam berkata, mengikut soal siasat yang dijalankan terhadap dua suspek itu, modus operandi terbabit sudah digunakan sejak beberapa bulan lalu.

Menurutnya, tekong dan awak-awak ditahan dan dibawa ke markas PPM Pengkalan Kubor untuk siasatan lanjut.

"Sementara bot yang dianggarkan bernilai RM100,000 turut disita.

"Kes disiasat mengikut Seksyen 21 Akta Kawalan Bekalan 1961," katanya.

Artikel ini disiarkan pada : Khamis, 23 January 2020 @ 7:35 PM

